

Trais candidaturas – trais dumondas

In ün mais elegia la Val Müstair a sia presidenta o a seis president cumünal. Sper Gabriella Binkert Becchetti, la presidenta actuala, lessan eir duos oters candidats surtour l'uffizi: Thomas Schadegg ed Ivo Lamprecht. La FMR lascha gnir a pled a tuots trais candidats – cun lur respostas a trais dumondas.

Als 22 da settember 2024 elegia il Cumün da Val Müstair seis presidi cumünal. La presidenta in uffizi daspö il

2021, Gabriella Binkert Becchetti (PPS) da Sta.Maria, recandidatescha per üna prosma perioda d'uffizi. Ma ella survain quista jada concorrenza da duos homens – da Thomas Schadegg da Tschierv (independent) e dad Ivo Lamprecht da Lü (independent). Tuots duos sun al mumaint eir commembers da la suprastanza cumünala dal Cumün da Val Müstair e candidateschan dimena «cunter» lur aigna presidenta.

La FMR ha fat a tuots trais, in vista ad üna discussiun da podi da quist venderdi in chasa da scoula a Sta.Maria (verer chaistina suotvart), las listessas trais dumondas a regard lur böts e lur visiuns pel Cumün da Val Müstair.

Intervistas: David Truttmann/fmr



Gabriella Binkert Becchetti voul restar ün'ulteriura perioda d'uffizi presidenta cumünala da Val Müstair fotografia: mad



Ün dals trais candidats ufficials pel presidi dal Cumün da Val Müstair: Ivo Lamprecht, paur da Lü. fotografia: mad



Thomas Schadegg abita daspö il 2020 in Val Müstair e voul uossa dvantar president cumünal. fotografia: mad

Perche recandidatescha Ella respectiva- maing perche candidateschan Els pel pre- sidi cumünal da la Val Müstair?

Gabriella Binkert-Becchetti: Eu fetsch simplamaing fich jent quist uffizi, eir schi s'es confruntà cun sfidas e minchatant eir cun critica e dischillusiuns. Sch'eu guard inavo sün meis quatter ons sco presidenta cumünala, lura suna satisfatta da quai cha nus vain instradà. Il sviamaint da Sta.Maria es uossa ün pass inavant, nus vain pudü consolidar la situaziun cun occupar las piazzas cumünalas, las finanzas sun tant inavant in uorden e nus vain eir fat noss dovairs in connex culs progets turistics da La Sassa a Tschierv. In quel cas dependa uossa tuot dals tribunals. Ma üna perioda d'uffizi da quatter ons es simplamaing massa cuorta per fingià trar ün bilantsch. Quel bilantsch fessa jent davo ot ons. La collavuraziun cun nos persunal es colleghiala e buna – ed eu dess perquai jent eir dūrant ils pros- sems ons ün o tschel impuls, impustüt als giuven impiegats.

Ivo Lamprecht: In quists quatter ons in suprastanza n'haja pudü observar our da prüma man co cha'ls process po- litics giran in Val Müstair. Ed i's po dir chi regna üna tscherta malquietezza, tant in suprastanza, sco eir in general in val. I vain plont e rögnà – e divers pro- gets restan bloccats. Ma la Val Müstair am sta ferm a cour, e perquai lessa cha l'atmosfera as müda. Eu less cha'ls pro- ceders politics dvaintan darcheu main formals, cun daplü san inclet, in dis- cuors radschunaivels. Eu n'ha annunz- chà pür l'ultim mumaint, la fin da lügl, mia candidatura pel presidi. Per quel pass n'haja decis, perquai ch'eu crai d'esser üna persuna fidada chi sta cun tuots duos peis sün terra.

Thomas Schadegg: Mia motivaziun principala: I sto dar ün müdamaint! Nus eschan in üna situaziun, ingio cha plüs progets sun bloccats, sainza chi's vess propi üna strategia cumünaivla co chi pudess ir inavant. Perquai regna eir ün'atmosfera politica in Val Müstair ferm tendüda e polarisada, quai chi's ti- ra tras tuot las cumischiums ed uniuns. Eu less ragiundscher cha la val dis- cuorra darcheu cun üna vusch, cha eir giuvnas affaristas e giuven affarists as saintan motivats da s'ingaschar in Val Müstair, sainza stuvair avoir temma da repressiuns. Nus stuvain sviluppar da cumünanza darcheu strategies per svi- luppar inavant quista bella val chi'd es üna perla. Pel mumaint faina be pass inavo.

La candidata ed ils duos candidats

Fin la fin da lügl 2024 han trais per- sunas annunzchà lur candidatura uf- ficiala pel presidi cumünal in Val Müs- tair. Quai sun:

Gabriella Binkert Becchetti (PPS, 63 ons) es daspö l'on 2021 pre- sidenta cumünala in Val Müstair. In quella funcziun presidiescha ella la Conferenza da presidentas e president da la Regiun Engiadina Bassa/Val Müstair. Ella es eir presidenta dal cus- sagl administrativ da la destinaziun turistica Engiadina/Samignun/Val Müstair (TESSVM). Daspö 13 ons mai- na ella insembel cun seis hom ün bain d'agriturismo in vicinanza dal Lai da Garda (I).

Ivo Lamprecht (independent, 55 ons) es daspö quatter ons suprantant dal Cumün da Val Müstair, ingio ch'el es respunsabel pel decasteri dals pro- vedimaints, dal militar, da la pro- tecziun civila e da la pulizia. El es paur e viva a Lü.

Thomas Schadegg (AdC, 55 ons) es daspö l'on 2022 in suprastanza cu- münala, ingio ch'el ha suot sai il de- casteri da planisaziun, fabrica, infra- structura ed abitaculs. L'impressari da fabrica viva daspö l'on 2020 in Val Müstair, ingio ch'el lavura sco cus- gliader d'impraisas ed ingio ch'el mai- na a Tschierv insembel cun sia parte- naria ün bed&breakfast.

L'elecziun dal presidi cumünal es als 22 da settember. Vaira precis ün mais avant, in venderdi, ils 23 d'avuost a las 20.00 organisescha la società «Mia Val Müstair» in chasa da scoula a Sta. Ma- ria ün podium cun tuot ils candidats e las candidatas, saja per il presidi, ma eir cun las candidaturas cuntschaintas pella suprastanza. L'elecziun pella su- prastanza e per otras autoritats cumü- nalas sarà però pür in november.

(fmr/dat)

Che es tenor Ella/Els la plü importanta sfida o schanza pel cumün – e co less El- la/Els tour per mans quella?

Gabriella Binkert-Becchetti: Üna da las schanzas pella Val Müstair vez eu illa digitalisaziun chi'd es ün potenzial economic, voul dir eir cun üna rait da fibra da vaider per noss affars e sün nivel cumünal. E lura craja chi detta amo po- tenzial pro'l trafic public in val, p.ex. cun introduer per part ün tact da mezz'ura. Turisticamaing es tenor mai impustüt il proget dal resort da La Sas- sa/Minschuns üna gronda schanza chi güda a chattar insembel üna strategia turistica per l'avegnir. Dasper tuot quai am sta a cour la sgürezza da la popula- ziun, tanter oter eir cun sanar ils cun- tschets dals flüms a Sta.Maria/ Muranzina ed a Tschierv. Insomma, eu less pudair surdar a la generaziun giuv- na bunas premissas per viver in Val Müstair, cun üna buna infrastruttura da scoulas, vias ed edifizis – ma im- pustüt lessa pudair dar sün via ad els ün spiert positiv.

Co vess la Val Müstair da's preschantar in 20 ons – chenüna visiun esa da per- seguirar?

Gabriella Binkert-Becchetti: Per üna politicra sun 20 ons ün temp vaira lung! – Ma eu crai cha la Val Müstair pu- dess spordscher in avegnir piazzas at- tractivas güsta in secturs digitals. Per ra- blar quella glieud cun lur famiglias in Val Müstair vaina insè fich bunas pre- missas e bun potenzial: terrain da fa- brica prezius, bellas chasas veglias e ta- blats vöds, e nus vain impustüt üna richa natüra e cuntrada culturala, chü- rada dūrant tschientiners. La Val Mü- stair po giovar ün'importante rolla re- giunala, güsta eir in collavuraziun ed in contact cun noss vashins da l'Engiadina, dal Vnuost e da Buorm. Ed eir la cul- tura ed identitè rumantscha sun da gronda valur ed ans distinguan dad otras cumünanzas. Quai vaina da chü- rar e da posiziunar. I'l turissem vezza amo ün grond potenzial per cha'ls giasts restan plü lönych illa val e pro- lungan la bella stagiun d'utuon.

Ivo Lamprecht: Il plü important es da far avanzar progets chi stan quiet al mu- maint. Pro la scoula stuvaina s-chaffir l'infrastructura chi correspuonda al temp dad hoz, quai chi pudess eir pro- mouver cha famiglias vegnan a star in Val Müstair. Pro'l sviamaint da Sta. Ma- ria esa da metter aint ils prossems pals, per finalmaing augmantar la qualità da viver in quella fracziun. E lura daja amo otras sfidas e progets cha nus stuvain tour per mans: il proget dal resort La Sassa culla colliaziun i'l territori da skis Minschuns sto il cumün sustgnair plain- namaing. E lura lessa cha la val dvainta plü autonoma culla forza electrica, tan- ter oter cun prodüer daplü energia foto- voltaica. E sco ulteriur punct: Nus stu- vain generar daplü progets forestals – quai chi porta lavur in Val Müstair.

Ivo Lamprecht: Id es da far quint cha la Val Müstair varà in 20 ons almain cir- ca 200 abitantas ed abitants damain! Quai para a prüma vista ün scenari pes- simistic, ma id es üna prognosa realisti- ca. Id es be da trar in memoria il svilup da la populaziun dals ultims 20–30 ons. La Val Müstair vaiva vers ils ons 2000 var 1800 abitantas ed abitants. Hoz sun quai damain co 1400 persunas. Noss'unica schanza es da render la Val Müstair uschè attractiva chi's riva da trar nanpro daplü glieud o almain da tgnair quella populaziun cha nus vain. In quel connex po güsta il Parc da natü- ra Biosfera Val Müstair servir sco exam- pel. Voul dir, id es da cumbinar nos plü grond chapital – la natüra – cun ün turissem radschunaivel e cun üna mansteranza sana. Nus stuvain restar pro nossas fermezzas – e restar realistics, sainza far experimaints.

Thomas Schadegg: Nus stuvain in mincha cas promouvoir l'attractività da viver e lavurar: s-chaffir novas piazzas da lavur, piazzas da giarsunadi e lura eir spazi d'abitar. I nu po esser cha nus spordschan piazzas da lavur in val, ma la glieud viva lura i'l Vnuost. Per aug- mantar l'attractività douvra raps, eir raps da dadour la val. Là esa sim- plamaing necessari da fabrichar sü raits da contact, p.ex. sur padrinadis, ün contact chi s'ha tralaschà i'ls ultims ons. A nivel turistic ston tuots trar vi da la listessa sua, in direcziun dad ün turis- sem perdürabel. Blers mansterans e ble- ras impraisas muossan cun lur prodots in che direcziun chi stu vess ir – per exaimpel culla producziun da charn e chaschöl indigen. E nus ans stuvain orientar precis vi da quel giast chi tschercha quella sort da turissem. La Val Müstair nu po as prestar dad esser malperüna in quella dumonda.

Thomas Schadegg: In 20 ons sarà la Val Müstair – cuntrari a la situaziun actuala – sün üna uonda positiva e da progress, cun üna ferma mansteranza ed ün commerzi viv chi fan valair la Val Müstair vers inoura, uschè ch'ella vain eir propi percepida in möd positiv. Jau sun da fich buna spranza pella val, ella ha bunas premissas. Però la situaziun actuala, cun blera dischuniun e dis- fiduzcha, am dà rumpatesta. Quai frena blers progets – sco p.ex. il sviamaint da Sta.Maria, il proget da la jugi o la scoula – chi fessan nair dabsögn in Val Müstair.